

I zovins furlans si contin su YOUpaTUBO

Presentât il gnûf canâl
YouTube in lenghe
furlane, fat di fantats
par chei de lôr etât

Al è «un lûc virtuâl là che si pues imparâ e divertîsi, scuvierzi alc di gnûf sul Friûl, sui furlans e sul furlan, ma dulà che si pues ancje zuiâ. Al è duncje un spazi ae puartade di ducj» il president de ARLeF, **Eros Cisilino**, al à descrit cussì, vie pe conference stampe davuelte te sede di Udin de Regjon Friûl-V.J., **YOUpaTUBO**, il gnûf progjet fat dai zovins, pai zovins: vot fantats fra i 20 e i 28 agns che a contin su YouTube lis lôr tantis passions cun ironie. Tai mès passâts la ARLeF e à publicât un bant in rêt cun chês di cjatâ zovins che a vessin voie di contâsi e condividi i lôr interès, par furlan, ma no dome. Di li e je nassude une piçule clape di youtubers. A son propit lôr che a



L'Assessôr regionâl aes autonomiis locâls, Pierpaolo Roberti, Mattia Cantarutti, Federico Iob, Davide Buccheri, Federico Benedet e il President de ARLeF, Eros Cisilino.

àn sielt i temis di frontâ e cemût fâlu, par dâ forme e strutture a un gnûf canâl Youtube, ma che al cressarà une setemane daûr di chês altre. «E je une iniziative une vore utile par pandi la lenghe furlane fra i zovins e o fâs i compliments ae ARLeF», al à marcât l'assessôr regionâl aes

Lenghis minoritariis e corejonâi tal forest **Pierpaolo Roberti**, che al à fevelât de colaborazion cun Ente Friuli nel Mondo - al jere presint il president **Loris Basso** - tant che alc di pardabon impuartant «par che il canâl al sedi cjalât ancje dai zovins furlans che a cressin tal forest».

E rive de Americhe la super mame testimonial de lenghe furlane!

E à non Julia Renalds, e rive dai Stâts Unîts ma e je a stâ a Morteau, in Friûl. E je mari di doi fruts di 9 e 6 agns che a fevelin in maniere perfete furlan, inglès e talian. E à let tant su la formazion plurilengâl e no à vût dubis: «O ai capît che i vantaçs a son pardabon tancj, pal cerviel e no dome». Cussì jê e il so om, furlan, a à decidût di fevelâ ai lôr fruts, za de nassite, dome par inglès, ma insiorant la cjase cul furlan in graciis dal "jutori" di libris e musiche. Intant, li dai nonos paternis la uniche lenghe e je simpri stade dome il furlan. Il talian, invezit, al è stât zontât te scuele de infanzie. Vuê a cjase di Julia e dal om si fevele soledut par inglès, ma li dai nonos par furlan. I fruts, aromai piçui omenuts, a sielzin in maniere libare quale lenghe doprà daûr des situasions là che si cjatin. «Se cuant che a jerin plui piçui a dopravin lis lenghis in maniere plui rigjide, cumò a sperimentin cence pôre». Di Julia, al rive duncje un invît ai gjenitôrs che a fevelin furlan: «O vês la clâf par judâ i fruts cu lis lenghis forestis, dopraitle».

Julia Renalds



La scuadre di YOUpaTUBO

Federico Benedet (Fane), Diego Scarsini (Tumieç), Francesco Colombino e Lucia Bello (Ruvigne), Fabio Valvason (Basilian), Federico Iob (Udin), Mattia Cantarutti (Riçûl), Davide Buccheri (San Denêl). A son lôr i fantats di YOUpaTUBO!

Un grup svariât par capacitâts linguistichis (no ducj, di pueste, a san fevelâ furlan in maniere perfete), etât, passions, lavôr e divignince gjeografiche, ma che in curt si è ben misturât par rivâ a creâ formats divertents par frontâ lis tematichis plui diversis!